

# INUIT ATAQATIGIIT

## Inatsisartuni



UKA2019/Imm. 49

16. oktober 2019

Stine Egede

**Meeqqanut pinerliisimanginnermut uppersaatiip imaa annertusillugu meeqqanik atoqateqarsinnaangorsimasunik kinguaassiutigut pinerliisimanerit ilanngunneqartalernissaat pillugu Kalaallit Nunaanni Meeqqanut pinerliisimanginnermut uppersaammum malittarisassat allanngortinneqarnissaat siunertaralugu naalagaaffeqatigiinni oqartussaaffinnut saaffinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Allanguinerup peqataanik Namminersorlutik Oqartussat meeqqanut pinerliisimanginnermut uppersaammik piniarnissaminnut pisussaaffeqarnerat annertusineqassaaq inuit meeqqanut oqaatigineqartut ukiulinnut attaveqartartussanngorlugit atorfinittussat imaluunniit sullissisussat ilanngunneqarsinnaanngorlugit.**

(Inatsisartunut Ilaasortaq Steen Lynge, Demokraatit)

Siullermik Steen Lynge Demokraatit siunnersuuteqarneranut qutsavigissavarput.

Inuit Ataqatigiit Naalakkersuisuunitsinni 2010-mi suliaq ingerlassimasarput atuutilernermini aaqitassaartoq paasinarmat kingusinnerusukkut, tassalu 2015-mi naqqiivigineqatsiartoq qujamasuutigaarput.

Qularnanngilluinnarpormi atuuffimmini meeranguit ataasiinaanngitsut iluaqusersimassagai.

Inatsisilli suliaapput nalimmassarneqartuarsinnaallutik.

Taamaattumillu siunnersuuteqartup qaqitaa Inuit Ataqatigiinni taperseratsigu oqaatigissavarput.

Meeqqat amerlasuut inuusuttuaranngoraluarlutik, tassalu 15-ileereeraluarlutik imminnut illersorsinnaanerit ilaatigut suli annikittarpoq. Immineerlutik killissartik sumiinnersoq nalornisarmassuk. Inuusuttuaranngulernermilu ilisarnaatit paatsiveerutitsinnaasarmata sumut killissaq inississanerlugu amerlasuut nalornisarpaat.

Angajoqqaatut annertuumik tassani pisussaaffeqarpugut. Meeqqatta alliaartorneranni piffissaqarfigisarnissaat, assigiinngitsutigut ilinniartittuarnissaat soorlu killissaminnik qaangiivigitinnginnissamut sakkussaannik ilinniartinnissaat naaggaarsinnaanissaanillu ilinniartittuartaqarpat.

Meeqqat mikinermi angajoqqaaminnik oqaloqateqarnermik ilikkarsimagunik, alliaartornerilu aallaavigalugit sammisat annertusiartortikkaanni, minnerunngitsumik paquminartunik

aporfeqannginnissaannik ilinniartikkaanni oqinnerusumik inoqatiminnut saaffiginnissinnaanerinnik aamma ilinniartissavagut.

Maanna inatsisit atuuttut isikkumigut / sannamigut atuunnermini pisortani sulliviit annerusumik pineqarneri Inuit Ataqtigiinni eqqumaffigeqqussavarput. Isumaqarpugut meeqqanik illersuiniarutta pisortat suliffeqarfiutaat ataasiakkaarlugit taajorneqarsimasut kisiisa pineqartillugit, meeqqat ilai takkuitsoorivut.

Tassami ullumikkut meerarpassuit / inuusuttuararpassuit 18-it inorlugit ukiullit pisiniarfinni sulisarput, taakkulu illersorneqarpat? Taassuma saniatigut inuusuttuaranngortut, apersortereernikut amerlasuut "nukappiaraataallutik/niviarsiaraataallutilluunniit" suliffeqarfinni assassorfiusuni assigiinngitsuni atuareeraangamik suliartortarput.

Aammattaaq bussertartut taxanik ingerlatsisut, imaatigut angallassisartut eqqarsaatigisariaqarsoraagut.

Naalackersuisut tamanna eqqarsaatigisimaneraat paaserusunnassaaq.

Siunnersuut pitsaanerpaamik inerneqaqqullugu ataatiimititaliami eqqartorluarneqarnissaanik ataatiimititaliaq susassaartoq Inuit Ataqtigiinni kaammattorusupparput.

Ataatiimititaliaq allannguutissamik, tassalu ilassummik suliaqaqqullugu kaammattorusupparputtaa. Naatsorsuutigarpummi tamatta suliamut tapersiinissarput.

Qujanaq